

## *Woar of niet woar ?*

Dick van Bloemendaal

*Hele kleine verhaoltsjes die soms warkeluk gebeurd bin en verhaoltsjes die ik uut m'n duum 'ezeugen het. Veur julie een vraag, mar veur mien een weet, welke wel of niet woar bin.*

### *Standwarker*



Standwarker is un beroep dat dur al van vrogger of 'eweest is. Zo'n keerl die op de mart spulletjes probeert te verkoopen. Dat doet hie dan mit un heleboel stampeï dur um heen um zo-veul meugeluk volk um zun kraam te kriegen.

Toen ik un jong van un jaor of twaolf , dartien was stung dur ok zo'n standwarker op de Puttermart um un smeerseltsje te verkoopen. Ut was un Amsterdammer, dat ko'je wel an zun uutspraak heuren. In tied van effen had hie un bonk volk um zun kraam staon en begon hie te vertellen dat ut smeerseltsje van hum un wondermiddel was. Hie had ut zelf 'emaakt en dur ok un mooie naam an 'egeuven, ut was un zalfje dat WEGGA heette. En zo trots as un pauw vertelde hie wat dat betekende, namelijk: Wie Eens Gebruikt, Gebruikt Altijd.

Ik heurde dat zo us an en ineens scheut dur un aare afkorting in mun gedachte en ik zei toen ok geliek dat ik docht dat WEG-

GA betekende Waag Er Geen Geld Aan. Man man , wat werd die standwarker toen kwaod, hie zou wel us effen achter zun kraam vandaon kommen en me morus leren. Mar dat was niet nodig want vur ik ut wist had ik al un beste klits um mun kop te pakken Ik schruk me rot en keek heel vurzichtig achterum um te zien wie me die klap door effen verkocht had.

En daor stung mun tante Garretje mit un kwaoje kop te kieken en toen zei ze tegen mien dak die klap best verdiend had mit mun grote waffel. Ut volk um de kraam stung dur un beetje bie te grinneken, mar de standwarker prees mun tante Garretje zowat de hemel in en ze kreeg vur niks un deusje mit dat smeersel. Achterof had ze dur niks an want ut was un soort zonnebrandzalf en ze zat nooit in de zon. Altied as ik un standwarker beezug zie um zun spulletjes an de man te brengen moe'k weer an disse dag denken, mar ik hou wieseluk mun mond, alhoewel ik die klits van tante Garretje niet meer kan kriegen want ze is al jaoren dood.

+++